

曰舍利何自而生崙對曰此精氣所畜也人修練精神則皆有  
舍利海中大蚌有寶珠蛇有明月珠蛇與蚌豈物之善而獨有  
此乎但精氣所畜耳 上笑之○豐海道留舩之倭將四艘潛  
還其島○門下侍郎贊成事李居易辭 不允○乙酉興國寺  
金人出汗翌日遣中樞院使崔有慶設七日道場以禳之○門  
下府上䟽請各品告身必署經臺省 不允䟽略曰告身之法  
署經臺省者所以勵廉恥激士風也近當草創之時急於用人  
始為官教之法是一時之權也然躡等而冒受者比比有之庶  
司負吏官至四品即受官教略無謹慎瘳官廢職廉耻不興士  
風不美者盖由此也今當國家已定當以激勵士風肅清朝廷  
為重伏惟特令一品以下告身皆署經臺省以勵士風○戊子  
西北東有赤氣○己丑日冠西北有赤氣○御經筵同知經筵  
事全伯英講畢啓曰今者冬煖春寒宜小心敬慎 嘉納之○  
書雲觀上言災異之譴非禱於佛神而可弭願夙夜敬畏以答  
天變知經筵事河崙曰佛者西域之胡神昔西土之人橫逆無